





LETTRE
DE
MAISTRE
GVILLAVME
ENVOYEE DE L'AV-
tre monde.

A.
MESSEIGNEURS LES
Princes retirez de la Cour.



A PARIS,
Chez JEAN MILLOT, Imprimeur &
Libraire, demeurant en l'Isle du Pa-
lais, vis à vis les Augustins.

M. D C. XV.

Avec permission.

Case

F

39

.326

THE NEWBERRY
LIBRARY

1615 qui



LETTRE
DE MAISTRE
G V I L L A V M E , E N V O Y E E
D E L ' A V T R E M O N D E .

MESSEIGNEURS LES PRINCES
retirez de la Cour.

MES tres-honorez seigneurs
Je crois que vous avez
tous quelques fois ouy par-
ler de ce maistre Guillaume,
qui ayant souz le bon & noble Roy Iean,
il y a bonne piece de temps, courageuse-
ment reprimé l'insolence de ses manges
peuples, qui abusoient de sa patience,
donna nom à la Guillaumerie : C'estoit

le grand pere de mon ayeul, duquel ie tiens encôre auourd'huy mal-gré la malice du temps, & l'auarice des chicaneurs, vne petite Guillaumerie: ce que ie fis avec tant d'heur, que i'impetray d'eux ce que tous ceux qui y auoient esté enuoyez auparauant n'auoient peu obtenir.

Depuis on m'a tenu en ce quartier pour vn homme fort persuasif & propre à manier telles affaires. Cela faict que plusieurs gens de bien, & amateurs de paix, estimant que ie pourrois auoir le mesme pouuoir sur vous: Mes tres-honorez seigneurs m'ont quasi forcé de vous escrire sur les nouueaux bruits de ceste guerre, qui nous ont tellement effrayé en ce pays, que le gros Pineau, mon proche voisin, à cause de son establisement (ne vous desplaise) iura dernièrement la teste bœuf son serment des bonnes festes, que de ceste année il ne semeroit auoine, de peur d'engraisser les cheuaux de ceux qui mangent les poulles, sans en conter les plumes de crainte de les payer, meschanceté si grande qu'on dit

5
que le Diable s'en fait des aïles , pour
s'esleuer en l'air , quand il a enuie de
faire gresser sur les bleds.

De sorte que quand la guerre n'ap-
porteroit autre mal'heur que celuy là,
i'estime que ceste seule consideration
seroit capable de vous diuertir de la faire
si vous en auiez quelque dessein : Mais
ie ne me puis persuader , que tant que
vous serez ceux que vous estes, s'est à di-
re ceux que vous deuez estre, la seule
pensée vous en puisse seulement tom-
ber en l'ame. I'ay cognu vos peres, & vos
ayeuls quasi tous. C'estoient de tres-
braues Princes, & qui ont rendu de si
grand tesmoignage de leur fidelité à nos
Roys, & de leur affection à l'Estat , que
s'est peché de presumer legerement au-
tre chose de leurs enfans, non moins he-
ritiers de leurs vertus que de leurs biens.
Car premierement quel profit vous en
pourroit-il reuenir. Les armées ne s'en-
tretiennent point de vent, il ne faut pas
que la paye manque , autrement vous
n'auiez ny Capitaine ny Soldats assés,
à peine les receptes du Roy y peuuent

elles fournir? Vous trouuerez possible
au commencement quelque credit és
bourses d'Alemagne, où de Holande:
mais au bout il faudroit payer: & c'est
lors qu'il cuit: car de croire que le traicté
de paix se chargeat de tous ces frais, ie
ne pense pas, quoy que l'on die, qu'on le
fit, on s'en est trouué mal autresfois: tout
cela demeureroir sur vos coffres. Pour
le plaisir, hé! mes très honorez seigneurs,
qu'il y a bien plus de contentement à ce
promener dans les Tuilleries à voler le
Heron à saint Germain, à courir le cerf
à Fontaine-bleau, à rompre la lance con-
tre le faquin à la place Royale, à manger
des œufs à la Portugaise au petit more,
qu'à boire la poussiere de la campagne, à
porter la chaleur de midy sur le dos, à
dormir armé sur l'affust d'un canon, à
se leuer trois heures deuant le iour, pour
aller donner vne camifade, en danger de
laisser du poil, & à souffrir mille autres
semblables incōmoditez, d'autant plus
fâcheuses à personnes de vostre condi-
tion, que vous auez esté plus delicate-
ment nourris entre toutes sortes de vo-

luptez & passe-temps? Que s'il ny a n'y profit n'y plaisir, encore moins d'honneur: car qu'elle loüange d'auoir troublé le repos & bon-heur du Royaume, durant la minorité de nostre ieune Roy, nous auons vne si bonne, si vertueuse & si sage Royne, qu'il sera fort mal-aisé de persuader au peuple, que vous soyez m'eus d'un pur & vray desir de son bien, si vous separez vos conseils, de ceux de sa Majesté, & vous esloignez de ce Soleil du Louure, sans la lumiere & l'influence, duquel rien de ce qui concerne le public ne peut auoir force n'y vigueur. C'est pourquoy, pardonnez à ma nayfue & grossiere liberté, si ie vous dis que vous n'avez pas esté bien conseillez en cest affaire: car vous eussiez à ce que dit tout le monde, beaucoup mieux procédé, si vous eussiez vous mesmes d'un commun accord proposé de viues voix à Paris, ie pense bien à la verité que l'affection que vous avez tous au bien & repos du public, vous pourroit exciter en l'esprit le desir de voir quelque reglemēt aux desordres de l'Estat: mais ie ne pen-

se pas que vous estimiez que la guerre source de toute confusion & desolation, soit vn moyen propre pour y pouruoir, il n'y a paix qu'elle qui soit, qui ne vaille mieux qu'une guerre. Si les mains demandent à quelques-uns qui sont à l'entour de vous, qu'ils les aillent frotter contre les murailles de Constantinople, ou gratter aux moustaches du Sophy, iusqu'à ce que le sang en sorte, mes tres-honorez Seigneurs, vous estes François & auez plus que tous autres interest à la conseruation de ceste Monarchie. Prenez donc garde, (s'il vous plaist,) que vous ne la iettiez en quelques troubles & diuisions domestiques, qui la puissent perdre. Elle ne craint rien que du dedans, tant que nous y serons en bonne intelligence, nous nous trouuerons inuincibles au dehors, il faudra que tout le reste du monde nous cede.

F I N.



